



La vischnanca da Casti e la vischnanca da Mondavosvart sin la costa.

FOTO J. MENOLFI



Baselgia da Mistail a trais absidas, construida enturn il 800.

FOTO N. SIMMEN

Tranter Meir e Crap Ses

Ils abitadis en la Val d'Alvra Dadora

■ **Il Meir (tudestg: Schyn) furma il cunfin natiral tranter Tusaun ed il Surmeir. A l'entrada da la Val d'Alvra sa gruppeschan divers abitadis enturn Casti che furma il center da la regiun. A partir dal 2015 vegnan las vischnancas dad Alvaschein, Casti, Mon, Stierva, Surava, Brinzauls ed Alvagni a furmar la nova vischnanca politica dad Albula/Alvra.**

Mutten (Mut)

Vischnanca politica, circol Alvaschagn, district Alvra. Culegna a trais stgalims situada a 1395 m sin la spunda sid dal Meir, cun Mutten Sut (culegna principala abitada durant l'entir onn), Stafel (1761 m, culegna da vacanzas cun aclas) e Mutten Sura (1863 m, culegna da stad e da vacanzas). 1363 *unz uff die Mutten* (betg documentà), 1549 *Hans ab Mutten*, tudestg Mutten (uffizial). 1803 98 abitants; 1850 132; 1900 193; 1910 99; 1950 125; 2000 80. Mutten sa constituiva oriundamain dad alps ed aclauns da Stierva e Ziràn. Ils signurs territorials de Vaz paran d'avair colonisà suenter il 1300 la regiun da Mutten cun Gualsers. Mutten furmava cun Stierva in quart dal cumün da Vaz, ma la vischnanca aveva in agen mastral e disponiva dapi il 1655 era d'ina dretgira matrimoniala. Ecclesiasticamain appartegna Mutten a Stierva. Il 1582 ha la vischnanca adoptà la cretta reformada. Baselgias èn vegnidas erigidas il 1583–84 a Mutten Sut ed il 1718 a Mutten Sura. Ils abitants vivevan da l'allevament da muvel e da la cultivaziun dad ers en ina regiun isolada cun sendas privlusas; l'agricultura, pratrigada sin trais stgalims, aveva per consequenza che l'entira populaziun midava domicil en il decurs da l'onn. Dapi il 1851 è Mutten l'unica vischnanca da lingua tudestga e reformada en il circol d'Alvaschagn. La via charrabla construida il 1869 (dapi il 1903 cun access a la staziun da la Viafier retica a Solas) ha pussibilità in turissem moderà. Il 1946 è ina gronda part da Mutten Sura daventada victima d'in incendi. Il 2005 lavuravan anc 83% da las persunas cun activitad da gudogn a Mutten en il sectur primar. *Jürg Simonett*

Alvaschein (Alvaschagn)

Vischnanca politica, circol Alvaschagn, district Alvra, situada a la cruschada dals pass dal Güglia e da l'Alvra sin ina terrassa al nordost da l'Alvra. 1154 *Alvisinis*, 1551 *Dalvaschain* (emprima versiun romanisada). 1850 156 abitants; 1900 276 (construcziun da la Viafier retica); 1950 208; 2000 154. Chats d'iseglias dal temp da bronz sin territori communal. Durant la construcziun da la via dal Meir (1869) han ins scuvert plattas da reliev surdoradas dal temp autmedieval. La derivanza exacta da questas plattas n'è betg cumprovada. Alvaschagn era probablmain ina staziun da duana al cunfin dals dominis

dals baruns de Vaz e da l'investgieu da Cuira. La vischnanca ha appartegnì ecclesiasticamain a la claustra da mungias da Mistail fin a la secularisaziun da quella il 1154, alura a Casti. Dal 1653–57 han chaputschins erigi ad Alvaschagn la baselgia barocca da S. Giusep ch'els han pastorà fin il 1922. La baselgia ed ina chasa remartgabila cun sgrafits (Franz Appenzäler, Hans Ardüser jun.), construida il 1580, han resistì a l'incendi dal 1745. Dapi il 1400 posseda Alvaschagn las alps ad Altein/Tavau. Fin enturn il 1950 predominava l'allevament da muvel. L'arrundaziun dal 1950 ha reduci las 676 parcelas a 113. Il 2008 existivan mo pli quatter bains purils. Las pussaivladads da lavurar en la proxima vischnanza (via dal Meir 1870, Viafier retica 1900, Ovra electrica Niselas 1905, via d'autos 1980) han adina puspè influenzà il dumber d'abitants durant il 19avel e 20avel tschientaner. Exploitaziun da gip tras la Gips-Union AG Turitg (1900–06 e 1926–60). Fin il 1980 sa chattava la vischnanca d'Alvaschagn a la via da transit, cun la construcziun dal tunnel da sviament è ella vegnida isolada. Sin territori communal, en vischnanza dal passadi dal temp medieval, sa chattan las trais punts da Solas (d'ina autezza dad 80 resp. 90 m), construidas en ils onns 1869, 1902 (viafier) e 1980. Alvaschagn posseda ina scola dapi il 1845 (engroniment da la chasa da scola 1890; 1893 21 scolars, 1966 28, 1983 5, perquai consorzi cun Casti fin il 1991). Pe da taglia favuraivel grazia a la furniziun d'aua al lai da fermada Niselas da las Ovras electricas Turitg (engrondi il 1989). Construcziun d'ina nova chasa da scola cun ina halla polivalenta 1990. Il 2001 han las tschintg vischnancas dal circol d'Alvaschagn abolì la mastralia, tegnida fin alura en roda era ad Alvaschagn durant 150 onns. Part da la populaziun da lingua rumantscha: 1880 95%; 1941 77% (lingua materna); 2000 40,3% / 51,4% (megra lingua/tuttas indicaziuns). *Gion Peder Thöni*

Mistail

Baselgia ed anteriura claustra da mungias en la vischnanca d'Alvaschagn. Quest convent episcopal è vegnì fundà avant il 806, probablmain sin iniziativa da la claustra da Cazas. A la fin dal 9avel tschientaner *Sororibus ad Impidines* (tenor il *Ministerium Impetinis* carolingic da la regiun da l'Alvra), 926 *Uapitines*, avant il mars 954 *Prades*, 1290/98 *Monasterium*. La baselgia actuala a trais absidas, deditgada a s. Peder il 926, è vegnida construida enturn il 800; ils edificis anteriurs n'èn betg databels cun tschertezza. L'edifici conservescha restanzas da frescos dal temp da sia fundaziun. La claustra è vegnida schliada tranter il 1096 ed il 1154. Alura ha l'investg Adelgott legà la baselgia cun las curts (migiurias) da Prada (vischnanca

da Casti), Suagnign e Latsch sco proprietad al convent da premonstratens da S. Gliezi a Cuira. Il 1282 èn la baselgia e las curts da Prada e Suagnign puspè turnads a la diocesa ch'ha sutmess l'administraziun da quels bains ad in vicedominat, infeudà a la famiglia de Marmels il 1386. Da Mistail dependeva probablmain era l'ospizi da S. Peder, menziunà il 831 sco *xenodochium sancti Petri*. L'ospizi sa chattava probablmain en vischnanza da la claustra e n'era betg identic cun quel sin il Pass dal Set. Cuntrari a documents literars pli vegls na po la collegiata da Mistail betg vegnir identiftgada cun la baselgia originara da l'entira Val d'Alvra (e probablmain era dal Surses). Tuttina para Mistail d'avair servì sco baselgia da sepultura a la plaiv da Casti. Per il temp medieval tempriv èn attestads al nord da la baselgia actuala fossas entagliadas en il grip da plattamorta ed al sidvest in mausoleum cun arviut. Suenter la dissoluziun da la claustra ha la baselgia salvà il dretg da sepultura, l'emprim apparentamain per l'entira Val d'Alvra, fin il 1679 anc per la vischnanca d'Alvaschagn. Quella cumparà gia il 1397 a chaschun da la reconsecraziun sco sia possessura. A la sava dal 15avel tschientaner èn vegnids realisads, probablmain en connex cun quest act, ils frescos a l'apsida principala ed a la paraid nord sco era la tur e la sacristia. Al nord da la baselgia èn vegnidas a la glich restanzas dals edificis conventuals. Ina part da l'atrium, attestà tras ses fundamentals vest dal sanctuari, è glichsnà giu en la chavorgia da l'Alvra. *Florian Hitz*

Tiefencastel (Casti)

Vischnanca politica, circol Alvaschagn, district d'Alvra (lieu principal), situada al pe dals pass da l'Alvra e dal Güglia. Il 831 è menziunà per l'emprima giada in *Castello Impitinis* cun sedia da l'administraturoial, a partir dal 14avel tschientaner *Tiefenkasten*, tudestg Tiefencastel (uffizial). 1850 135 abitants; 1880 209; 1900 257; 1950 327; 2000 230. Culegna dal temp da bronz a Plattas, castel roman sin il crest-baselgia, chats da munaidas da metal dal terz e quart tschientaner. Dal temp medieval tempriv datescha ina culegna fortifitgada, dal temp medieval ina punt da dazi. Casti è passà – probablmain cun la donaziun dad Otto I al domini episcopal l'onn 960 – sco feud als signurs de Vaz ed ad auters vasals. Suenter la mesadad dal 16avel tschientaner è daventada la dretgira da Casti (dretgira civila), ensem cun ils vischinadis da Casti, d'Alvaschagn e da Mon, ina part integrala da la dretgira auta da Surmeir entaifer la Lia da la Chadé. Tar il sontget odiern a la via dal Güglia sa chattava la chaplutta da S. Ambrosi, construida en il 6avel/7avel tschientaner. Il 1343 vegn menziunada la baselgia odierna da S. Steivan ch'è vegnida reconstruida il 1650

da chaputschins e munida cun preziasas picturas e sculpturas da lain. Dal 1635–1945 han chaputschins talians pastorà la Val d'Alvra davent da Casti (center da la missiun retica dals chaputschins). Il 1890 ha in incendi destrui grondas parts da la vischnanca. Fin il 1900 manava l'uschenumnada Via Sura sur ils pass dal Güglia e dal Set tras Casti. Suenter il schlargiament da las vias da pass han las staziuns da la posta a chavals (1835) e da la viafier (1900) fatg da Casti in center dal traffic stradal e ferroviar. Ina via da sviament parziala (1999) ha purtà in levgiament a la vischnanca ch'ha patì sut il grond traffic da transit dapi ils onns 1970. Hotels erigids a partir dal 1850 oravant tut per dar alloschi a passants han purtà a la vischnanca oriundamain purila in gudogn supplementar. Casti è stà fin il 1950 il lieu da martgà da muvel il pli impurtant da la regiun. Mastergnanza, manaschis da servetsch, pauca industria. Avertura da l'Ovra electrica Filisur-Casti 1900. Il 2005 lavuravan 63% da la populaziun cun activitad da gudogn a Casti en il servetsch terziar. Funcziun parziala da center regional (scola secundara cirquitala, cooperativa da consum Alvra-Surses). Malgrà la scolina e la scola primara rumantscha regredescha la populaziun da lingua rumantscha continuadamain: 1880 88,9%; 1980 50% (lingua materna); 2000 37,9% / 58,7% (megra lingua/tuttas indicaziuns). *Gion Peder Thöni*

Mon

Vischnanca politica, circol Alvaschagn, district Alvra, situada al sidvest da Casti sin la spunda sanestra dal Surses. 1001–1200 *de Maume*, 1281 *Mans*, tudestg Mons (uffizial fin il 1943). 1850 155 abitants; 1900 112; 1950 105; 1990 67; 2000 86. En il temp roman e fin enturn il 1400 manava la ruta per ils pass dal Set e dal Güglia sur Mon. Sur il vitg è vegnida scuverta ina fravgia dal temp roman ed ina fossa. Fin il 1559 ha Mon appartegnì al territori episcopal, alura a la dretgira auta dal Surses sco part da la Lia da la Chadé. Il 1592 ha Mon obtegnì il dretg d'in agen sigil. En l'impurtanta baselgia dal temp romanic tempriv, deditgada als ss. Cosma e Damian (menziunada per l'emprima giada 841), sutmess fin il 1468 a la claustra da Faveras, èn conservads frescos dal 1400; las duas statuas dals patrunds-baselgia (15avel tschientaner) èn vegnidas enguladas il 1977. Il 1592 è Mon daventada ina plaiv autonoma, unida cun Casti. Il 1643–48 han chaputschins erigi la baselgia barocca da S. Francestg; Johann Rudolf Sturn ha realisà ils frescos ch'èn per part vegnids surmalegiads il 1915 e rendids puspè visibels durant la renovaziun dal 1975. Dapi il 1960 vegn la plaiv pastorada davent da Stierva. Il 1870 è vegnida construida la via charrabla da Mon

a Casti. Il vitg tradiuzionalmain puril quintava il 2005 anc 10 bains purils (59% da las plazzas da lavur). Ultra d'ina ustaria e d'ina officina per maschinas agriculas dispona Mon d'in turissem moderà (ca. 15 chasas da vacanzas). Dapi il 1972 ha Mon furmà cun Stierva e Salouf in consorzi da scola. Part da la populaziun da lingua rumantscha: 1990 72% / 88%; 2000 52,3% / 68,6% (megra lingua/tuttas indicaziuns). *Gion Peder Thöni*

Stierva

Vischnanca politica, circol Alvaschagn, district Alvra, construida a mantun sin la spunda sanestra da la Val d'Alvra inferiura. Attestà en l'«Urbari curretic dals bains imperials» (ca. 840) sco *Seturivuo*, tudestg Stürvis (uffizial fin il 1943). 1850 179 abitants; 1900 150; 1950 150; 2000 128. Il 1984 han ins scuvert restanzas d'ina fundaria da bronz (e pli tard d'arom) da l'onn 1800 a.C. en vischnanza da l'aclaun da Tiragn (1600 m). En il 12avel e 13avel tschientaner ha furmà Stierva il cunfin tranter il territori dals baruns de Vaz ed il Surmeir en possess da l'investgieu da Cuira. Il 1275 han ils de Vaz perquai laschà eriger il chastè da La Tor (abità anc oz) che serviva da sedia als signurs da *Stürffis*, attestads per l'emprima giada il 1312 ed estinguids en il 15avel tschientaner. Lodierna baselgia gotica, consecrada a s. Maria, datescha dal 1521 ed è vegnida construida sin il fundament da duas baselgias precedentas, documentadas il 1290 ed il 1357. A partir dal 1356 ha Stierva appartegnì al territori episcopal e dal 1552–1851, ensem cun Mut, a la dretgira auta da Vaz entaifer la Lia da la Chadé. Fin il 1950 è Stierva stà in vitg puril cun entradas impurtantas da la cultivaziun dal guaud. Las tegias dals trais aclauns, utilisads a ses temp sco pastgiras da primavaira, e quella da l'alp veglia èn vegnidas transfurmadas en chasas da vacanzas. Suenter il 1950 èn sa diminuids ils bains purils; grazia a la meglieraziun iniziada il 1960 ed a purs giuvens po l'agricultura dentant survivor. Fin il 2013 ha Stierva furmà cun Mon e Salouf in consorzi da scola cun la scola primara a Stierva. Part da la populaziun da lingua rumantscha: 1880 98,5%; 1941 89,5% (lingua materna); 2000 66,4% / 80,5% (megra lingua/tuttas indicaziuns). *Gion Peder Thöni*

Lexicon Istoric Retic

Il LIR cumpiglia bundant 3100 arttgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.